

佛說正恭敬經

元魏天竺三藏佛陀扇多譯

如是我聞一時佛在舍衛國祇樹給孤獨園與聲聞比丘二百五十人俱菩薩五百人皆是如來種子權行六道助佛揚化知衆生根

長六

十四

威德自在顯發如來方便密教其名曰生疑

菩薩寶德菩薩光明王菩薩慧燈菩薩德臻

菩薩悉達菩薩無畏菩薩覺首菩薩財首菩

薩寶首菩薩德首菩薩目首菩薩進首菩薩

法首菩薩智首菩薩賢首菩薩如是等菩薩

摩訶薩五百人俱爾時尊者阿難白佛言世

尊樂法善男子善女人當云何敬法及敬法

師爾時世尊告阿難言止止阿難今時衆生

不能恭敬及有敬法阿難白佛言世尊我今

樂法及以敬法已敬當敬世尊自我親近如

來以來未曾得聞如此法門以不聞故恭敬如來必失儀則今若聞者故得如法修行是事世尊復有樂法善男子善女人聞此法門即得修行世尊復有如是法中出家比丘貧窮下賤但求衣食不樂求法及敬法師雖復

親近佛法而行下賤不能隱覆必當示現世

尊是故我今現在自爲并及未來一切比丘

諮請如來如是敬法世尊我等云何得修正

行惟願如來爲我解說佛告阿難樂敬法善

男子善女人若欲讀誦請問往至經法應當

長六

十五

和尚阿闍黎所至其所已應問和尚阿闍黎

如來正法隨心所樂當知和尚阿闍黎心所

知法先應諮請聽問以不師若聽者然後乃

問雖復歲數若二十爲樂法故應往諮請

及受依止何以故如來法中雖聽五歲比丘

得離依止然彼人以初敬爲法求樂法故何以故是人爲欲成就自德行故阿闍黎者應如是與依止或言可或言如是或言爾或言利或言教誨或言謹慎行莫放逸如法端正修行作如是與依止比丘成就如是等法可與依止彼得名爲成就依止假使百歲比丘不能通達如是等句彼人應受依止況能與他作依止師若使無歲比丘成就如是等法沙門密語即得名爲已受依止假使百歲不達如是等法諸句律者彼應受依止是中誦經比丘應於阿闍黎所作敬重心及正恭敬彼讀誦受經者在阿闍黎前不得露齒不得瞻足不得動足不得疊足不得踣足不得弄足不得高座處坐師不借問亦不得語不得違師語不得一向瞻相師面住在師

前三肘而立師聽坐即坐坐已於師所起慈悲心彼誦經者應先誦熟熟者誦已從師受經任意多少隨諸法門中若有疑者先應諮請聽問以不師若聽可然後當問彼受經已右膝著地兩手接禮師足若地處惡者隨所有道却退而行當至平處若地處先平彼應禮師足然後當行行至十肘復更作禮然後隨道而行彼應作如是念阿闍黎常逐我後我不能遠離阿闍黎彼應知時日三時到阿闍黎所若不到者應如法治若到而不見阿闍黎者彼應若草若木若杖若土塊若石令作記識若阿闍黎在房宴坐者彼應旋房禮敬然後當行若有所作不問師亦不得作除大小便不得向師作麤獷惡語不得重循師語隨師所坐之處若繩牀若木牀皆不得坐

彼牀若壞即應治之彼應晨朝時往知時往不得非時往彼往已應問阿闍黎當何所須及何所作爲入聚落不若言入阿闍黎所有衣被應洗手自衣拭手兩手提師衣已著淨處先與師淨水洗手然後授衣與師於後安多會拂塵與之或覆身衣或雨衣或所須餘衣資用之者彼應如是敬不得阿闍黎前涕唾若寺內若寺東西不得左右反抄衣不得纏頭隨師所居有經行處掃灑令淨日三時拂扇三時洗浴三時諮問取水爲師乞食若師有所作者彼應用力作之若食竟應從師索鉢洗之若與先洗師鉢然後自洗已鉢師若不與不得重索何以故阿難未來有如是比丘作是念言如來等正覺鉢無有洗者彼學我故自欲洗之如來聽如是等人夏取清

涼冬取溫暖隨所須者皆應得取不得師前嚼楊枝不得說師若好若惡若遙見師應起迎接阿難若從讀誦諮請一四句偈是名阿闍黎是故彼應恭敬阿闍黎阿難若不如是敬阿闍黎者以不敬故住不正行說師過惡者彼不說我以爲世尊何以故阿難彼人不重佛不敬法不在僧數何以故阿難如是癡人不得名爲住正行中阿難住正行者我爲彼人說佛法耳爾時尊者阿難涕泣流淚作如是言世尊未來世中若有衆生能住能行如是等行甚爲希有世尊我能行住如是等行世尊若有比丘不能恭敬和尚阿闍黎及說過者彼人得何等報佛告阿難若有比丘不敬和尚阿闍黎及說過者我說彼人愚癡凡夫何以故阿難不得說阿闍黎實惡何況

說虛是中阿難若不恭敬和尚阿闍黎者有
辟支地獄名之爲滅彼人命終生彼地獄彼
人生已即有四頭身上火然如熱鐵丸是中
有諸蟲名爲鐵狗常所食噉彼人舌根是處
命終生畜生中作虎狼野干衆生見者皆唱

言是虎狼野干有所見者無能喜樂以本口
過故常食糞穢受報已盡復生人中常在邊
地無佛法處雖生人中具足衆惡遠離功德
身形色力不類人狀稟受身形不似父母不
爲父母之所憐愛常被惡謗遠離諸佛生生
愚癡闇鈍無智速墮地獄何以故以不恭敬
教授施法濟拔難者故阿難如是等人數得
苦法阿難假使讀誦受持一四句偈及以經
卷書寫供養隨彼字等劫若頂若肩若背荷
負彼師及一切樂具而供養之阿難如是供

養已猶不能報阿闍黎恩佛告阿難未來世
中有如是等諸惡比丘得是經已而不恭敬
阿闍黎和尚者以無行故說阿闍黎和尚過
我今當記如是比丘愚癡人等墮諸地獄受
大苦惱阿難我今告汝及以正勅如來已說
善惡道行隨彼衆生所行善惡得報如是是
故阿難汝等今當應善恭敬應善思量阿難
善恭敬善男子善女人得此法門者讚歎出
離訶欲不淨諸塵垢盡得法眼淨爾時阿難
更整衣服白佛言世尊此法之要當名何經
比丘比丘尼優婆塞優婆夷云何受持修行
於未來世紹三寶種使不斷絕佛告阿難此
經名爲正恭敬如是受持所謂愛佛愛法愛
僧佛說是經已尊者阿難及諸比丘并諸菩
薩聞佛所說皆大踊躍歡喜奉行

